

خَطِ سِوَمِ يُوْحَنَا

پیشگفتار

نوشته کُننده امزی خطِ ام یُوْحَنَا باچه زیدی آسته و ای خطِ ره بلده غایوس رهبرِ جماعتِ ایماندارا نوشته کده. دَ امزی خطِ یُوْحَنَا از غایوس تعریف-و-توصیف مونه و بخاطرِ کومک و تشویق شی تَشْکُری مونه. مگم یگ نفرِ دیگه ره که نام شی دیوترفیس آسته سرزنش مونه و غایوس ره دَ باره ازو خبردار مونه.

فهرستِ عنوانها

دُعا و سلام (آیه ۱-۴)

قدردانی از غایوس (۵-۸)

شکایت از دیوترفیس (۹-۱۰)

نصیحتِ یُوْحَنَا (۱۱-۱۲)

سلامِ آخری (۱۳-۱۵)

دُعا و سلام

^۱ از طرفِ بزرگِ جماعت، بلدهِ غایوسِ عزیز که او ره دَ راستی دوست دَرُم.

^۲ دوستِ عزیز، ما دُعا مُونُم که از هر نگاه کامیاب و تندرُست بشی امو رقم که روح-و-روان تُو سالم آسته. ^۳ ما غدر خوشحال شُدُم و ختیکه بعضی برارو آمده دَ باره تُو شاهدی دَد که تُو دَ حقیقت وفادار آستی و مُطابقِ راستی-و-حقیقت رفتار مَوکنی. ^۴ ازی کده هیچ خوشی بلده مه بزرگتر نیسته که بشنوم که بچکیچای مه دَ مُطابقِ حقیقت رفتار مونه.

قدردانی از غایوس

^۵ دوستِ عزیز، دَ هر چیزی که بلده برارون ایماندار انجام میدی، وفاداری خُو ره ثابت مَوکنی، حتی اگه اونا قد از تُو ناشنخته ام بشه. ^۶ اونا دَ باره مُحَبَّت تُو دَ حُضُورِ جماعتِ ایماندارا شاهدی دَد. اگه اونا ره بطورِ خُدا پسندانه دَ سفرِ رَبی کُنی، کارِ نیک مونی، ^۷ چون اونا بخاطرِ نامِ مسیح بلده خدمت کدو بُر شده و هیچ رقم کومک ره از مردُمای غیر

ایماندار قبول نكده. ^۸ پس بَلَدِه ازمو فرض آسته که از ای رقم
آدما پذیرایی کنی تا قد ازوا دَ اِعلان کدونِ حقیقت شریگ
شنی.

شکایت از دیوترفیس

^۹ ما یگ خط بَلَدِه جماعتِ ایماندارا نوشته کدیم، مگم
دیوترفیس که خوش دَره نفرِ اوّل بَشه توره ازمو ره قبول
نمونه. ^{۱۰} پس اگه بییم، از کارای که او انجام میدیه یاد
آوری مونم، چون او دَ باره ازمو از روی کینه تورای پوچ-و-
ناسزا مویگه و دَ امزی کارا ام قناعت نكده، بلکه از برارونِ
ناشنخته ام پذیرایی نمونه و کسای ام که میخایه پذیرایی
کنه، اونا ره مَنع نمونه. اگه از آید شی نشد، اونا ره از
جماعتِ ایماندارا بر مونه.

نصیحتِ یوحنا

^{۱۱} دوستِ عزیز، از چیزای بدِ سرمشق نگیر، بلکه از چیزای
خوب. هر کسی که کارِ خوب مونه، از خدا آسته، و له هر
کسی که کارِ بد مونه او خدا ره ندیده. ^{۱۲} پگِ مردم دَ باره

خوبی دیمیتربوس شاهدی میدیه، حتی خود حقیقت ام. مو ام
د باره ازو شاهدی میدی و شمو میدنید که شاهدی ازمو راست
آسته.

سلام آخری

^{۱۳} ما غدر چیزا درم که بلده تو نوشته کنم، مگم نمیخایم که قد
قلم و سیاهی د روی قاغذ نوشته کنم، ^{۱۴} مگم امید درم که تو
ره د زودی بنگرم و مو روی د روی توره بگی.

^{۱۵} آسایش-و-آرامش نصیب تو شنه. دوستا سلام های خو ره
بلده تو ری مونه. دوستا ره د اونجی ام نام گرفته سلام بگی.